

嘉業堂
叢書

安龍逸史

安龍魂

史二卷

吳興劉氏
嘉業堂刊

安龍逸史序

嗚呼國運至變遷之際如漢之建安唐之天復宋之景炎讀史君子未嘗不爲之歔歔慨惜三致意焉前明歷代相承世無失德迨熹宗之季凶奄內擅流賊外訌明之宗祀不絕如綫崇禎先帝宵旰憂勞良以求治太急責效太速弗辨忠奸以察爲明一時臣工救過不暇遂致上下相遁以文法弭盜而盜愈張文恬武嬉將驕卒惰而且水旱相仍饑饉頻告天災人異天之亡明豈待再計哉卒之兵纏於垣禍及生靈郡邑丘墟神州榛莽宏光有可爲之時而首壞於馬士英阮大鍼隆武有可爲之姿而再壞於鄭芝龍分符之勦鎮盡屬叛臣列土

之公侯俱爲逆黨事緩則競寵以邀榮事急則賣降而
鼠竄雖曰奉主大半營私明之天下洵無一片乾淨土
也福京旣陷制閫諸臣援立永祿帝於搶攘之秋區區
嶺表欲作南陽不甚難哉嗚呼天之亡明以開我
大清億萬年之丕基云爾大廈之傾豈一木所能支乎
況夫君非句踐無焦思苦心之志臣非種蠡無報讐雪
恥之才而一二閹黨嬖佞又從而擾亂之武夫悍卒大
肆其鴟張侍從左右仍恣其比黨其事亦何足述第以
地不大於曹滕民不眾於邾莒崎嶇跋涉奔走巖疆僅
託空名有如寄寓茹荼集蓼亡國之苦未有甚於帝者
也嗚呼痛哉愚嘗閱明紀編年則并隆武而遺之閱明

季遺聞則南寧駐蹕以後無聞焉嗟乎興亡之際先正
所嚴敢謂其奔蕩之餘遂并其事實而棄之讀史君子
不幾大昧厥心哉僕每以當年播遷粵在南服嘗欲搜
訪遺聞以備纂修明史之闕嚴以亂臣賊子之誅初得
也是錄旣序而識之矣茲以避兵武陽復覩安龍逸史
一書紀載雖無義例然自監國以至賓天始末釐然畢
備奸邪罪狀叛逆鐵案昭昭可覩爰錄而藏之以俟夫
異日考信前朝襄成全史則斯編也未必不可供天祿
石渠之採擇云爾古滇桐山元益父羅謙謹識

安龍逸史卷上

嘉業堂叢書

南海屈大均撰

按神宗末年同日冊封瑞惠桂三藩桂藩分封湖廣駐劄衡州府靜守藩封號稱賢王正妃王氏貴妃范氏後以選侍孫氏妖媚幸焉孫氏慣行巫蠱厭禳之事王遂不入王范二宮數年及巫蠱事發選侍坐死王始還宮生世子六人長次早夭至崇禎壬午三世子與四世子及冠會督撫題請發宗人府纂入玉牒序名咨行禮部會題因冊封三世子爲安仁王

至丙戌九月

月病薨

四世子爲永明王卽永祿帝也

崇禎十六年癸未桂藩移駐粵西

時張獻忠陷湖廣蹂躪全楚左良玉統轄重兵雄稱百萬聞賊至不復前賊到之處土崩瓦解桂藩乘鋒鎬之際移至西粵避難世子官屬暨宮人船隻盡阻於永州府浮橋下遇賊從陸路追至永州悉擄入營有鄉民稱有王在船內安仁永明遂被搜獲押禁永州衛隨進木籠令僞湖南道督率兵夫親行押赴南陽時僞道卽衡陽縣人中壬午鄉試徐姓者至王前密啟云臣係新科舉人爲賊所迫至此今幸起發王駕雖一面撥夫支吾預已遣報桂殿下自有兵救駕王請安心又囑看守官都司王有成小心伺候不許賊來驚擾每日必親來問候數次先是桂藩在桂林

時卽密遣人偵視得徐姓啟報遂與征蠻將軍靖江
藩同廣西總兵楊國威等商議飛調狼兵七萬兼程
而下於十二月恢復永州二王幸皆得免而徐君者
已死於亂軍中矣惜失其名焉獻賊聞永州不守知
粵西有備不復東顧遂去楚而入蜀云

崇禎十七年甲申廣西總兵楊國威旣恢復永州卽迎
二王出城星夜護送同回廣西時止留官將安撫楚
地凡係桂藩內外大小衙門人等俱贈路費送歸藩
下

二月桂藩父子君臣會集桂林惟五六兩世子訪無消
息廣西巡撫瞿式耜巡按郭封總兵楊國威等會議

桂藩係朝廷親王今遭賊難至此宜調度錢糧安置
但桂林有靖江藩不便同城湖南一帶雖賊已退然
殘破不堪不可驟回本國今廣西倉庫充實惟有梧
州一府請王先行遷蹕就近支糧應餉然後會題請
旨桂藩如請卽傳備船隻由府江順流而下

六月桂藩始至梧州沿江安蹕通省文武前來朝慰忽
報福王監國喜詔方到哀詔繼至及開讀宣言本年
三月十九日李自成陷北京烈皇帝罹難之慘桂藩
伏地大哭自辰至酉絕而復甦遂成不起之疾

八月桂藩薨於蒼梧葬於藤縣城北陵工告竣之後看
陵提督巡視等官每見五色雲氣覆之來相啟賀傳

有童謠云五色雲照王墳歸南土永自明人人聞之
不解所謂時二王貲囊罄盡且地方日見搖動倉廩
空虛藩府嬪妃僚屬眷人等尙有千餘卽寅支卯
糧不足供用況安仁王最殘刻於手足不親凡永明
王衣食之需每求用於王兄多不如意一日安仁王
遣內監周明押衣箱四扛送永明王舟中王見大喜
卽令啟視皆赭黃袍別無可以常御者王爲不悅周
明輒前啟曰王勿惱暫用收貯靜候天命有歸自有
御服之日後登大寶其言果信

大清順治二年乙酉

宏光元年

高平都統莫敬耀反廣西土

府思明龍川明江江州等處盡歸交趾幸南太參將

成大用調兵奮擊敬耀退走高平又湖南寧遠縣田
二縣錫礦礦頭蔣魁楚反率礦夫數千破恭城賀縣
粵西一帶復爲搖動時有原任湖廣撫標中軍雷志
建者爲賊所追兵敗攜有殘卒數百人逃往鎮陝關
招募義勇自稱總兵聚眾至萬餘力敵礦賊未幾撲
滅時楚粵之地悉遭兵賊之慘至秋稍息

八月唐藩建國福京詔至征蠻將軍靖江藩自稱監國
按靖藩自分封西粵以近處猺獞賊藪非有提調征
剿之權不能制故加以征蠻將軍之銜時聞兩京失
陷密與參謀孫金鼎議以勤王爲辭徧檄四方調集
漢土官兵又強致鎮撫按三司等官瞿式耜于元燁

張同敞鄭封及楊國威等勸進監國表文諸臣皆力
爲諫阻不聽又慮遲疑生變於是不及候所調兵馬
齊集止將現在城守及先至狼兵共不滿二百人立
傳藩下文武等眾於靖江府臨朝稱賀是日加參謀
孫金鼎爲參贊軍機大學士加參贊嚴天鳳范友賢
爲將軍總統左右前鋒留楊國威爲城守卽日誓眾
興師由水路出平樂抵梧州約會兩江兵齊下廣東
凡過州縣殺官刼庫荼毒全城於是桂府兩王舟泊
於梧州對岸方在危急存亡之際而兩廣總制丁魁
楚已得塘報卽飛疏請隆武旨一面發兵西上兩軍
正遇梧州靖藩見所調兵不至徬徨無計西兵小棹

東師巨艦一鼓之間全軍喪膽覆沒而監國勤王之師一旦其魚矣魁楚傳令收兵恐驚桂府親來朝見撥兵守衛方議進兵追捕靖藩旣敗所攜輜重國寶盡失於水惟藉前鋒嚴天鳳十餘人駕一小塘舟飛渡至桂林城內堅壁不出金鼎從亂軍中逃竄僅搶得一王令卽由江上潯州催兵應援及抵潯惟見兩江兵船布列問何營兵馬報云南太參將成大用三里參將陳邦傳柳慶參將陳可觀皆調出勤王之師金鼎大喜蓋謂靖藩征調之兵已發又以陳邦傳爲兒女姻救援有人也因卽赴邦傳舟中盡以靖藩敗狀告邦傳且議進止時參畫胡執恭毛可求與同席

旣更深邦傳起更衣招執恭進密室謂曰今日靖藩
無謀動輒敗衄我等若少依違禍不旋踵矣幸金鼎
自來送死乘此擒戮以邀大功何愁不富貴耶計定
復入席謂金鼎曰今日之事大人知之乎金鼎曰已
知之不必言再將酒來痛飲沈醉以繩繫足投之水
邦傳密不令人知己乃取其屍剖腹去臟擦灰包扎
訖傳諭各兵船悉改勦逆紅幟卽夕解維下梧州謁
兩廣總制丁魁楚魁楚見之大喜敘爲首功先行慶
鎮征蠻將軍協令東師前定桂林臨城之日楊國威
旗鼓焦璉者與國威不協乃密傳其所部縛國威及
靖江藩嚴天鳳等械送軍前請邦傳進城安撫軍民

時城中撫按諸臣皆自以不能阻靖藩之叛人人自危同囚至魁楚處魁楚卽命械送福京得旨嚴天鳳楊國威處斬貶靖藩爲庶人安置廣東博羅縣至縣未幾死靖藩滅後潛邸宗室官校搜括無遺而陳邦傳封富川伯焦璉進都司使於是先朝之遺舊縉紳一時紛紛羅織滋害無得免者

順治三年丙戌

隆武二年

監國凶問至自閩

按監國於宏光元年六月卽稱監國總制丁魁楚據報知閩京已陷不聞於外密同總監龐天壽聯絡閩粵三省會同湖廣廣西督撫何騰蛟瞿式耜先朝輔臣何吾騶黃士俊等合疏請桂藩監國時安仁王於

九月發病薨於蒼梧而三省文武臣咸集言社稷爲重不可少緩涓吉於十一月十九日擁戴永明王監國於廣東肇慶府取藩封永字又以神宗嫡孫取厯字改元永厯頒行正朔以來年丁亥爲永厯元年郊天告廟隨頒喜詔繼發隆武皇帝哀詔大行恩赦親定文武衙門聯絡勦鎮陞賞有差特諭不立東廠不選宮人諸臣朝罷喜相謂曰鳳準龍額中興主也不設東廠不選宮人可謂善政之始皇太后召對羣臣諭云今朱家皇帝僅存此一綫纘承大統願諸先生盡忠竭力相輔之溫諭諄諄文武拜謝感泣各圖自奮頗有中興氣象云